

**'Kami Sayang PM' Lagu Khas Untuk Semua Perdana Menteri M'sia
Bernama
7 Februari, 2013**

KUALA TERENGGANU, 7 Feb (Bernama) -- Sebagai tanda terima kasih golongan mahasiswa kepada keenam-enam Perdana Menteri Malaysia satu lagu bertajuk 'Kami Sayang PM' akan dilancar pada majlis prapelancaran di Pekan Pahang Jumaat.

Pengerusi Gabungan Generasi Muda (G2M) Mohd Shahar Abdullah berkata lagu itu juga sebagai tanda penghargaan kepada semua Perdana Menteri yang telah dan sedang menerajui negara sejak merdeka hingga sekarang.

"Jatuh bangunnya negara bergantung kepada pemikiran seorang Perdana Menteri dan kita sebagai rakyat sepatutnya berterima kasih kepada mereka yang banyak berjasa," katanya kepada pemberita ketika ditemui pada program Jelajah Anak Malaysia di sini, Khamis.

Menurutnya sepanjang program Jelajah Anak Malaysia itu mahasiswa akan mendengar masalah rakyat untuk direkod dan akan menghantar laporan hasil kaji selidik itu kepada Perdana Menteri Datuk Seri Mohd Najib Tun Abdul Razak di akhir program.

Mohd Shahar berkata program itu juga memberi peluang kepada mahasiswa berkomunikasi, mempelajari cara menguruskan organisasi dengan baik dan mempelajari cara berhadapan dengan masyarakat.

Program itu bermula pada 31 Jan lepas di Putrajaya dan dijangka berakhir 15 Feb ini di tempat sama melibatkan 200 mahasiswa, belia dan NGO.

-- BERNAMA

Copyright © 2013 BERNAMA

Source: <http://www.bernama.com/bernama/v6/bm/newsindex.php?id=926886>